



景
木
續

後
漢
書

辛酉夏仲

安吉吳昌碩篆書
時年七十八



獨全

深識

遠覽之明

力主大公至正之道如臣末學爲時鄙儒
自幼承師法於先臣有志明天下之大義
凡疑似是非之際必反復辨析其閒名不
假人斥垣衍帝秦之論物不失舊大少康
祀夏之功非固徇管見臆決之私直欲還
天理人心之正采諸儒之遺說更再世以
成書小道或有可觀多見其不知量僅足

列兔園之列詎敢追麟筆之餘藏名山副
在京師論次媿十年之作

閱書林

幸乎東觀

宴閒禔

心夜之觀所有臣編次續後漢書紀表列
傳載記總計四十二卷謹繕寫成八冊隨
表

上進以



聞臣常誠惶誠懼頓首頓首謹言

天啓元年
冬十一月



續後漢書一上

廬陵 蕭常

昭烈皇帝諱備字立德景帝子中山靖王勝
之後也勝子貞元朔二年封陸城侯因家
於涿郡祖雄舉孝廉官至東郡范令父弘
亦仕州郡昭烈生於相帝延熹四年少孤
與母販履織席自給舍東南有桑高五丈
童童如車蓋或謂當出貴人昭烈與諸兒
戲桑下曰吾當乘此羽葆車叔父子敬謂
曰此妄言族矣年十五母使行學與同宗



劉惔然遼西公孫瓚師事故九江太守同郡盧植德然父元起給其資用與德然等元起妻女難色元起曰吾宗有此兒非常人也而瓚亦與友善昭烈不甚樂讀書喜狗馬音樂美丰儀身長七尺五寸垂手過膝顧自見其耳寡語言善下人喜怒不形於色好交豪俠年少爭附之中山大賈張世平蘇雙等貲累千金見而異之多遺之金以故得合其衆靈帝中平元年黃巾賊師張角起魏郡遣八使假善道以化天下

陰相連結自稱黃天分三十六部部各萬人一時俱發天下響應州郡各舉義兵昭烈帥其屬從校尉鄒靖討黃巾有功除中山安喜尉其後有詔罷免軍功爲吏者昭烈亦在遣中頃之大將軍何進遣都尉毋丘毅募兵丹楊昭烈與俱至下邳遇賊力戰有功除下密丞復去官中平末至京師會董卓亂義兵起昭烈亦聚衆從討卓後爲高唐令縣爲賊所殘往奔幽州公孫瓚瓚表爲別部司馬使與青州刺史田楷

拒冀州牧袁紹數有戰功試守平原令領平原相郡人劉平素與昭烈有隙恥為之下結客刺之客不忍語之而去歲大饑民苦鈔暴昭烈外禦寇難內振貧乏士之至者必與同席而坐同器而食衆多歸焉北海相孔融屯都昌為賊管亥所圍遣太史慈來告急昭烈曰孔北海知世間有劉備邪即遣精兵三千赴之賊尋解散袁紹攻公孫瓚昭烈與田楷東屯齊獻帝初平四年曹操攻徐州陶謙遣使告急於楷楷與

昭烈救之時昭烈有兵千餘及幽州烏丸雜胡騎又得饑民數千人既至謙以丹楊兵數千益之昭烈遂去楷歸謙謙表為豫州刺史屯小沛興平元年春操引兵還夏操復遣荀彧程昱等攻豫州昭烈為彧等所敗冬謙病篤謂別駕麋竺曰非劉立德不能安此州謙卒 帥州人迎昭烈昭烈固辭典也校尉下邳陳登進曰漢室陵遲海內傾覆立功立事正在今日此州殷富戶口百萬欲屈使君撫臨之昭烈曰袁公

路近在壽春此君四世五公海內所歸宜以州與之登曰公路驕豪非治亂之主今欲爲使君合步騎十萬上可以輔主濟民成五伯之業下可以割地守境書功竹帛惟使君幸聽登言孔融亦謂昭烈曰袁公路豈憂國忘家者邪冢中枯骨何足介意今日之事百姓與能天與不取悔不可追昭烈遂領徐州陳登遣使以奉昭烈之意告袁紹紹曰劉立德弘雅有信義今徐州樂戴之誠副所望也二年二月董卓餘衆

李傕郭汜相攻三月李傕脅天子幸其營四月郭汜攻李傕傕移天子幸北塢張濟自陝來和傕汜和七月車駕東歸楊定董承等侍送八月至新豐冬十月郭汜遣兵來逼乘輿楊定楊奉與戰破之十一月傕汜等追乘輿戰于東澗王師敗績車駕幸曹陽楊奉董承引韓暹李樂等帥師奉迎與傕等戰破之十二月車駕乃進傕等復來追王師大敗進幸陝北渡河至安邑是歲孫策如據江東

建安三年正月改元夏袁術來攻昭烈使
司馬張飛守下邳自將拒術於盱眙淮陰
相持累月下邳相曹豹陶謙故將也與飛
相失飛殺之城中乖亂術與呂布書勸令
襲下邳布即引軍東下中郎將丹楊許耽
反迎之飛敗走昭烈失其孥轉軍海西遣
使與布連和布亦憤術轉餉不繼乃召昭
烈還其孥復以為豫州刺史與并力擊術
昭烈屯小沛秋七月車駕至雒陽曹操表
昭烈為鎮東將軍封宜城亭侯八月操白

領司隸校尉錄尚書事操殺侍中臺崇尚
書令馮碩等以衛將軍董承為輔國將軍
庚申天子遷都于許冬曹操自為司空百
官總已以聽袁術遣其將紀靈等步騎三
萬復來攻昭烈求救於呂布布帥步騎千
餘來援靈等聞布至皆歛兵布要靈等與
昭烈釋憾遂各解去昭烈合兵復得萬餘
人布疾之自來攻昭烈復敗因誚曹操操
厚遇之表為豫州牧與俱至沛收散卒給
其糧與之兵使東擊布

二年袁術僭號於淮南秋曹操大敗之
術走渡淮韓暹楊奉寇掠徐揚聞昭烈要
擊盡斬之

三年夏呂布復與袁術通使其中郎將高
順騎都尉張遼來攻曹操使夏侯惇來救
不利九月順破沛城昭烈脫身去復失其
孥十月曹操自引兵助昭烈圍布於下邳
禽之昭烈復得其孥從操還許操表為左
將軍是歲天子遣謁者裴茂帥諸將誅李
傕夷三族郭汜為其將伍所殺

四年夏袁術欲繇徐州北從袁紹曹操遣
其將朱靈從昭烈要擊之程昱郭嘉聞昭
烈行言於操曰劉備不可縱操悔追之不
及昭烈之未東也與帝舅車騎將軍董承
偏將軍王服吳子蘭越騎校尉种輯等受
天子衣帶中密詔誅操操未之知從容謂
昭烈曰今天下英雄惟使君與操耳本初
之徒不足 昭烈謂事泄方食失匕箸
時適雷震因謂操曰聖人云迅雷風烈必
變良亦以也一震之威乃至此邪遂與承

等合謀會東出未至術病死昭烈遂據下邳朱靈等還昭烈乃殺操徐州刺史車胄留關羽守下邳身還小沛郡縣多叛操爲昭烈守有衆數萬遣孫乾與袁紹連和操使其將劉岱王忠來攻昭烈大敗之五年春董承等事覺曹操殺承等夷其族操欲自來攻其下皆曰與公爭天下者袁紹也今弃紹而東若何操曰劉備人傑也今不擊必爲後患袁紹雖有大志而見事遲必不動也遂來攻昭烈敗績操收其孥

并獲關羽以歸昭烈趨青州青州譚昭烈故茂才也將步騎來迎因至平原譚馳使白紹紹去鄴二百里率迎父子傾心敬之月餘所失亡士卒稍稍來集曹操與紹相拒於官渡汝南黃巾劉辟等叛操應紹紹遣辟等從昭烈徇許下關羽來歸操使曹仁等來拒昭烈還紹軍知紹無成陰規去計乃說紹南連荊州牧劉表昭烈遂將其兵至汝南汝南賊龔都帥衆降合數千人操其將蔡揚來攻昭烈大破之臨陣

斬揚吳歲紹與操相持于官渡紹軍大潰
孫策卒弟權襲其業

六年春昭烈頓軍汝南秋曹操夾攻昭烈
遣麋竺等與劉表相聞表郊迎之待以上
賓之禮益其兵使屯新野荊州豪傑歸之
日益多表疑焉使拒夏侯惇于禁等於博
望久之昭烈設伏偽遁惇等追之大爲伏兵
所破昭烈嘗於表坐起如廁顧見其髀裏肉
生慨然流涕還席表怪問之昭烈曰平時
身不離鞍髀裏肉消今不復騎髀肉遂生

日月若馳老將至矣而功業不建是以悲耳
七年夏袁紹卒其子譚尚相攻

九年秋曹操破袁尚自領冀州牧

十年曹操敗袁譚於青州殺之

十一年曹操廢齊北海阜陵下邳常山甘
陵濟陰平原八王除其國

十二年曹操北攻烏丸昭烈說劉表襲許
表不能用及操自柳城還表謂昭烈曰不
用公言失此大機昭烈曰今天下分裂日
尋干戈事會之來豈有旣哉若能應之於

後則此未足爲恨也是歲始用南陽人諸葛亮

十三年夏曹操自爲丞相秋八月操殺太中大夫孔融夷其族操攻劉表會表卒其子琮代立屯襄陽昭烈屯樊九月操軍至新野琮遣人約降昭烈不虞操之卒至遂將其衆去諸葛亮徐庶等並從昭烈過襄陽亮說昭烈攻劉琮荆川可有昭烈曰吾不忍也乃駐馬呼琮琮懼不能去遂降於操琮左右及荊州人多歸昭烈比到當陽衆

十餘萬輜重數千兩日行十餘里別遣關羽乘船數百艘使會江陵或謂昭烈宜速行保江陵今雖擁大衆被甲者少若操兵至何以拒之昭烈曰夫濟大事必以人爲本今人歸吾吾何忍棄去操以江陵有軍實恐昭烈據之乃輕軍到襄陽聞昭烈已過即以精騎五十來追一晝夜行三百餘里及於當陽之長阪昭烈兵不利乃棄其孥與諸葛亮張飛等數十騎從間道走漢津適與羽船會得濟沔會劉表長子江夏

太守琦衆萬餘人未有所鄉乃與俱至夏
口先是孫權遣魯肅弔劉表二子并令與
昭烈相結肅未至而操已向荊州肅與昭
烈遇於當陽因致權意且謂昭烈曰孫討
虜聰明仁惠敬賢禮士據有六郡兵精糧
多足以立事今爲君計莫若自結於東共
濟世業昭烈喜旣至夏口即遣亮隨肅詣
權且請兵擊操權遣周瑜程普等水軍數
萬會昭烈十二月昭烈以其衆會吳師及
操戰于赤壁大敗之盡焚其舟艦操走昭

烈復與吳師水陸俱進追至南郡時操軍
復飢疫死者大半操之北走也留曹仁等
守南郡昭烈屯油江口表劉琦爲荊州刺
史分遣諸將南徇四郡武陵太守金旋長
沙太守韓玄桂陽太守趙範零陵太守劉
度皆舉郡降廬江營帥雷緒帥衆數萬來
歸以諸葛亮爲軍師中郎將使督零陵桂
陽長沙三郡調其租賦以充軍實

十四年冬曹仁等敗委城北走周瑜領南
郡太守屯江陵昭烈表孫權行車騎將軍

領徐州牧會劉琦卒羣下推昭烈領荊州
牧治公安權進其妹於昭烈

十五年昭烈會孫權於京口於是盡有荊
州之地是歲權遣使來告欲共取蜀或以
為宜聽許吳終不能越荆以有蜀蜀地可
為吾有荊州主簿殷觀進曰若為吳先驅
進未能克蜀退為吳所乘即事去矣今但
可贊其伐蜀而以新得諸郡未可發興為
解吳必不敢越我而獨取蜀如此進退之
計兩得昭烈從之權果輟計遷觀別駕從事

十六年春曹操自以其子丕為五官中郎
將為丞相副益州牧劉璋聞操將遣鍾繇
等向漢中攻張魯大恐別駕從事蜀郡張
松說璋曰曹操兵彊無敵於天下若因張
魯之資以取蜀誰能禦之璋曰吾固憂之
而未知所出松曰劉豫州使君之肺腑而
曹操之深讎也且善用兵若使之討魯魯
必破魯破則益州強操雖來無能為也璋
然之主簿黃權固爭不可從事廣陵王累
倒懸於川門以諫璋皆不納使其軍校尉

法正帥步四千人迎昭烈敕所在供奉前後賂遺以巨億計正因陳益州可取之策治中從事龐統亦說昭烈曰荊州荒殘人物凋瘁東有孫權北有曹操難以得志今益州國富兵強戶口百萬寶貨山積可借此以定大事昭烈曰今與吾水火者曹操也操以急吾以寬操以暴吾以仁操以譎吾以正事乃可成今以小故而失信義於天下吾所不取統曰權變從時固非一道所能盡兼弱攻昧五伯之事逆取順守報

之以義事定之後封以大國何負於信今日不取終爲人利耳昭烈遂行留諸葛亮關羽等守荊州自將步卒萬人入益州至涪璋自出迎張松使法正啓昭烈龐統亦進說可於會襲璋昭烈曰初入其國恩信未孚此大事不可倉卒璋推昭烈行大司馬領司隸校尉昭烈亦推璋行鎮西大將軍領益州牧璋於是益昭烈兵使擊張魯又令督白水軍昭烈并軍三萬餘人車甲器械資糧甚盛璋還成都昭烈北至葭萌

未即討魯厚施恩德以結民心是歲孫權徙治秣陵

十七年春曹操矯天子命贊拜不名入朝不趨劔履上殿如蕭何故事冬操攻孫權權使使來告急昭烈使謂璋曰曹操攻吳吳憂危急孫氏與孤本爲唇齒又樂進在青泥與關羽相拒今不往救羽進必大克轉略州境其憂有甚於張魯魯自守之賊不足慮也乃從求益萬兵及軍資欲東行璋許兵四千餘所求皆給半張松書與昭

烈及法正曰今大事垂立何爲釋此去乎松兄廣漢太守肅懼禍及白發其謀於是璋收斬松嫌隙始開矣璋敕關戍諸將文書勿復關通昭烈昭烈大怒召璋白水軍督楊懷高沛責以無禮斬之乃使黃忠卓膺勒兵攻璋昭烈徑至關中質諸將并士卒妻子引兵與忠膺等進至涪據其城璋使劉瓚冷苞張任鄧賢等拒於涪瓚等皆敗退保綿竹

十八年春劉璋復使李嚴嚴目縣竹者軍嚴

帥衆降昭烈兵益強分遣諸將平定郡縣
進圍雒城諸葛亮張飛趙雲等將兵沂江
定白帝江州江陽惟關羽留鎮荊州是歲
曹操自爲魏公加九錫又以其三女爲天
子貴人

十九年夏拔雒城進圍成都征西將軍馬
超以其衆自漢中來歸拜平西將軍圍城
數十日劉璋出降遷之于南郡公安時蜀
中殷富昭烈大饗士卒取城中貲財分賜
將士而還其穀帛昭烈復領益州牧諸葛

亮爲股肱法正爲謀主關羽張飛馬超爲
爪牙許靖麋竺簡雍爲賓客如董和黃權
李嚴等皆璋之所信用吳懿費觀等又璋
之姻戚而劉巴輩亦吾宿昔之所忌恨皆
處之顯任盡其器能有志之士無不競勸
十一月曹操弒皇后伏氏滅其族并殺二
皇子昭烈聞之發喪制服曰老賊不死禍
亂未已操又自置旄頭宮殿設鐘虜是歲
分廣漢爲梓潼郡

二十年春曹操自以其女爲天子並又矯制

命已承制封拜諸侯守相孫權以取烈已得益州來求荊州昭烈曰須得涼州當以荊州相與權怒乃遣呂襲奪長沙零陵桂陽三郡昭烈帥師五萬下公安關羽入益陽秋曹操取漢中張魯走巴西孫權請和分荊州之江夏長沙桂陽東屬南郡零陵武陵西屬引還江州冬遣黃權帥師迎張魯未至魯已降操操還令夏侯淵張郃屯漢中郃等數犯巴境昭烈遣張飛帥師進次宕渠與郃等戰于瓦口大敗之郃

等收餘衆走南鄭昭烈亦還成都

二十一年夏曹操自進號魏王秋操殺瑯邪王熙除其國

二十二年夏曹操僭天子旌旗出警入蹕冬操冕十有二旒乘金根車駕六馬設五時副車又自以其子丕為魏太子昭烈帥諸將進兵漢中遣將軍張飛馬超吳蘭屯下辨操使其將曹洪等來拒

二十三年春正月京兆金禕六醫令吉本少府耿紀丞相司直韋晃等憤曹操竊國

起兵誅之不克夏昭烈分遣吳蘭雷銅等
入武都爲操軍所敗蘭死之昭烈次于陽
平討夏侯淵張郃

續後漢書一上

續後漢書一下

廬陵蕭常

二十四年春正月昭烈自陽平南渡沔水緣山稍前營于定軍興執淵等帥其衆來拒昭烈使討虜將軍黃忠乘高鼓譟攻之大破其軍臨陣斬淵及操所遣益州刺史趙顥等張郃走三月曹操帥其衆自長安入斜谷昭烈曰操雖來無能爲也我必有漢中矣及操至昭烈堅壁以老其師操軍士降者日益多乃遣將軍趙雲擊之操軍

大敗墮漢水死者萬數夏五月操悉軍走
昭烈遂有漢中遣孟達自秭歸北攻操之
房陵殺其守蒯祺又遣劉封孟達李平等
攻申耽於上庸耽舉郡降秋七月羣下上
昭烈爲漢中王表於天子曰平西將軍都
亭侯臣馬超左將軍長史鎮軍將軍臣許
靖營司馬臣龐羲議曹從事中郎將臣射
援軍師將軍臣諸葛亮盪寇將軍漢壽亭
侯臣關羽征虜將軍新亭侯臣張飛征西
將軍臣黃忠鎮遠將軍臣賴恭揚武將軍

臣法正興業將軍臣李嚴等一百二十八
言曰昔唐堯至聖而四凶在朝周成仁賢
而四國作難高后稱制而諸呂竊命孝昭
幼冲而上官逆謀皆憑世寵藉屐國權窮
凶極亂社稷幾危非大舜周公朱虛博陸
則不能流放禽討安危定傾伏惟陛下誕
資聖德統理萬邦而遭厄運不造之艱董
卓首難蕩覆京畿曹操階禍竊執天衡皇
后太子並罹弑虐剥亂天下殘毀民物久
令陛下蒙塵憂厄幽處虛邑人神無主遏

絕王命厭昧皇極欲盜神器左將軍領司
隸校尉豫荆益三州牧宜城亭侯備受朝
爵秩念在輸力以徇國難覩其機兆赫然
憤發與軍騎將軍董承同謀誅操將安國
家克寧舊都會承機事不密今操游魂得
遂長惡殘泯海內臣等每懼王室大有閹
樂之禍小有定安之變夙夜惴惴戰栗累
息昔在虞書崇叙九族周監二代封建同
姓詩著其義歷載長乂漢興之初割裂疆
土尊王子弟是以卒折諸呂之難而成太

宗之基臣等以備肺腑枝葉宗子藩翰心
在國家念在弭亂自操破於漢中海內其
雄望風蟻附而爵號不顯九錫未加非所
以鎮衛社稷光昭萬世也奉辭在外禮命
斷絕昔河西 梁統等值漢中興限於
山河位同權均不能相帥咸推竇融以爲
元帥卒立効績摧破隗囂今社稷之難急
於隴蜀操外吞天下內殘羣僚朝廷有蕭
牆之危而禦侮未建可爲寒心臣等輒依
舊典封備漢中王拜大司馬董齊六軍糾

合同盟掃滅凶逆以漢中巴蜀廣漢犍爲
爲國所署置依漢初諸侯王故典夫權宜
之制苟利社稷專之可也然後功成事立
臣等退伏矯制之罪雖死無恨遂於沔陽
設壇陳兵衆羣臣陪位讀奏訖御王冠於
昭烈昭烈上言天子曰臣以具臣之才
荷上將之任董督三軍奉辭于外不能掃
除寇難靖安王室久使陛下聖教陵遲六
合之內否而未泰惟憂反側疾首曩
者董卓首爲亂階自是之後羣凶縱橫殘

剝海內賴陛下聖德威靈人神同應或忠
義奮討或上天降罰暴逆並殪惟獨曹操
久未梟除侵國擅權恣心極亂臣昔與車
騎將軍董承協謀討操機事不密承見陷
害臣播越失據忠義不果遂使操窮凶極
逆主 遇弒皇子被害雖糾合同盟念在
奮力而懦弱不武歷年未効常恐殞歿孤
負國恩寤寐永歎夕惕若勵今臣羣僚以
爲在昔虞書崇叙九族庶明勵翼五帝損
益此道不廢周監二代並建諸姬實賴晉

鄭夾輔之福高祖龍興尊王子弟大啓九國卒斬諸呂以安太宗今操惡直醜正寔繁有徒包藏禍心篡盜已顯既宗社微弱帝族無位 酌古式依假權宜上臣大司馬漢中王臣伏自三省受國厚恩荷任一方陳力未効所獲已多不宜恭忝高位以重罪謗羣臣見逼迫臣以義臣退惟寇賊不梟國難未已宗廟傾危社稷將墜誠臣憂責碎首之負若應權通變以寧靖聖朝雖赴水火所不得辭敢慮常宜以防後悔

輒順衆議拜受印璽以宗國威仰惟爵號位高寵厚俯思報効憂深責重驚怖累息如臨于谷盡力輸誠獎厲六師率齊羣義應天順時撲討凶逆以寧社稷以報萬分謹拜章因驛上還所假左將軍宜城亭侯印綬於是還治成都以許靖為太傅法正為尚書令關羽為前將軍張飛為右將軍馬超為左將軍黃忠為後將軍拔魏延為鎮遠將軍領漢中太守鎮漢川九月曹操相國西曹掾濟陰魏諷等憤操將篡漢欲

舉兵誅之事泄為操所害是歲前將軍關羽帥師攻曹仁於樊操遣于禁等七軍救之羽大破禁軍盡虜禁等步騎三萬送江陵又斬其將龐德等梁郊陸渾羣豪皆輸欵於羽時羽威震華夏自許以南郡縣皆應羽操懼議徙都以避之會孫權襲殺羽取荊州

二十五年春正月曹操死子丕自為丞相魏王冬十一月曹丕篡帝位於繁陽國號改元黃初廢天子為山陽公或傳天子遇

害王乃發喪制服時所在言祥瑞者相屬將軍孟達叛奔于魏殺副軍將軍劉封十二月曹丕遷于維陽是歲後將軍黃忠尚書令法正卒

章武元年春故議郎陽泉侯劉豹青衣侯向舉偏將軍張裔黃權大司馬屬殷純益州別駕從事趙苻治中從事楊洪從事祭酒何宗議曹從事杜瓊勸學從事張爽尹默譙周等上言臣謹按雒書甄曜度曰赤日德昌九世會備合為帝際雒書寶號

命曰天度帝道備稱皇以統握契百成不
欺雜書錄運期曰九侯七傑爭命民炊骸
道路藉藉履人頭誰使主者立且來臣父
羣未亡時言西南數有黃氣直立數丈見
來積年時時有景雲祥風從璿璣下來應
之此爲異瑞又二十二年中數有氣如旗
從西竟東中天而行圖書曰必有天子出
其方是年太白熒惑填星常從歲星相追
去漢初興五星從歲星謀歲星主義漢位
在西義之上方故漢法常以歲星候人主

當有聖主起於此州以致中興時許帝尚
存故羣下不敢漏言頃者熒惑復追歲星
見在胃昴畢昴畢爲天網經曰帝星處之
衆邪消亡聖諱豫覩推察期驗符合數至
若此非一臣聞聖王先天而天不違後天
而奉天時故應際而生與神合契願大王
應天順人速即鴻業以寧海內太傅許靖
安漢將軍糜竺軍師將軍諸葛亮太常賴
恭光祿勳黃柱少府王謀等上言曹丕篡
弑湮滅漢室竊據神器劫迫忠良酷烈無

道人鬼忿毒咸恐劉氏今上無天子海內
皇皇靡所式仰羣下前後上書者八百餘
人咸稱述符瑞圖讖明驗黃龍見武陽赤
水九日乃去孝經援神契曰德至淵泉則
黃龍見龍者君之象也易乾九五飛龍在
天大王當龍升登帝位也又前關羽圍樊
襄陽襄陽男子張嘉王休獻玉璽璽潛漢
水伏於淵泉暉景燭耀靈光徹天夫漢者
高祖本所起定天下之國號也大王襲先
帝軌跡亦興於漢中今天子玉璽神光先

見璽出襄陽漢水之末明大王承其下流
授大王以天子之位瑞命符應非人力所
致昔周有烏魚之瑞咸曰休哉二祖受命
圖書先著以爲徵驗今上天告祥羣儒英
俊考述河雒讖記咸至于廷伏惟大王出
自孝景皇帝中山靖王之胄本支百世乾
祇降祚聖姿碩茂神武在躬仁覆德積愛
人好士是以四方歸心焉考省靈圖啓發
讖緯神明之表名諱昭著宜即帝位以纂
二祖紹嗣昭穆天下幸甚臣等謹與博士

許慈議郎孟光定禮儀擇令辰上尊號夏四月丙午即皇帝位于成都燔柴告天其祝文曰維建安二十六年四月丙午皇帝臣備敢用立牲昭告皇天上帝后土神祇漢有天下曆數無疆曩者王莽篡盜光武皇帝震怒致誅社稷復存今曹操阻兵安忍虐弑主后滔天泯夏罔顧天顯操子丕載其凶逆竊居神器羣臣將士以為社稷隳廢備宜脩之嗣武二祖龔行天罰備惟否德懼忝帝位詢于庶民外及蠻夷君長

僉曰天命不可以不答祖業不可以久替四海不可以無主率土式望在備一人備畏天明命又懼漢邦將湮于地謹擇元日與百僚登壇受皇帝璽綬脩燔瘞告類于天神惟神饗祚于漢家永綏四海於是建元為章武大赦天下以軍師諸葛亮為丞相太傅許靖為司徒置百官立宗廟祫祭高皇帝以下五月立妃吳氏為皇后立子禪為皇太子六月立子永為魯王理為梁王車騎張飛為其下所殺初帝憤孫權之

襲關羽秋七月車駕東征孫權遣使納款
帝怒不許權乃使其將陸議李異等屯巫
秭歸以拒王師將軍吳班馮習自巫攻破
異等軍次秭歸四萬餘人武陵五谿蠻夷
遣使請助討權是歲曹丕封權爲吳王權
遷于武昌

二年春正月將軍吳班陳式水軍屯夷陵
夾江東西岸二月行自秭歸敕諸將進軍
緣山截嶺營于夷道猇亭自佷山通武陵
遣侍中馬良宣慰五谿蠻夷咸相帥響應

鎮北將軍黃權督江北諸軍拒吳軍且備
魏寇夏六月黃氣見自秭歸十餘里中廣
數十丈王師敗績于猇亭將軍馮習張南
等死之鎮北將軍黃權以道梗沒于魏行
自猇亭至秭歸收合離散陸行還魚復改
魚復縣曰永安八月司徒許靖薨冬十月
詔丞相亮營南北郊於成都孫權聞車駕
猶駐白帝大懼十二月復遣其太中大夫
鄭泉來納款許之遣太中大夫宗璋如吳
帝不豫漢嘉太守黃元聞之舉兵反是歲

驃騎將軍馬超薨尚書令劉巴卒


三年春二月丞相亮自成都至永安三月黃元犯臨邛縣遣將軍陳曷討之元伏誅帝疾革丞相亮尚書令李嚴並受遺詔輔皇太子夏四月癸巳帝崩于永安宮時年十三遺詔百官發哀滿三日除服到葬期復如禮其郡國守相都尉令長三日便除五月梓宮至自永安秋八月葬惠陵謚曰昭烈皇帝帝寬仁大度知人善任使有高帝之風臣下雖有顯過必曲意原貸待

關羽張飛如親父子一見諸葛亮違衆用之遂成帝業又性儉約嘗毀帳鉤銅以鑄錢非軍功不妄賜予以故國用不至匱乏初入益州丞相掾趙戩問於徵士傅幹曰劉立德其濟乎幹曰立德寬仁有度能得人死力諸葛達治知變正而有謀而爲之相關羽張飛勇而有義皆萬人敵而爲之將此三人者皆人傑也以立德之略三傑佐之何爲不濟時馬謖有盛名亮每器之帝謂亮曰馬謖言過其實不可大用亮

不以為然後竟六街亭之敗

贊曰漢承秦慘刻之後高文以寬仁結人心淪浹既久牢不可解雖中更有禍變而人之謳吟思漢不絕于口世祖因之卒復舊物重以章帝惠及胎養培植益固靈獻之際可謂大壞極亂矣而一時英雄擁兵負固者猶以劉氏藉口昭烈父子以帝室支屬介在一隅而正位號當數十年由先漢至是垂祀五百三代以還蓋未之有人主之結人心其効迺爾有大物者庸可忽諸

續後漢書一下



蕭常續後漢書世罕傳本此本當出影宋鈔惜止上
下卷僅全昭烈皇帝本紀之一其所逸多矣是書為松
國坊王氏物故有震澤印書賈此以為未見之書索余
重直余亦遂置之久而售者無人仍與余易家刻書其直
合番餅一枚壬申歲初二日半恕道人補記





國家圖書館, NATIONAL CENTRAL LIBRARY, TAIWAN, R.O.C

